

INUIT ATAQATIGIIT

Inatsisartuni



1.marts 2024

UPA2024/51

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Eqqumiitsuliornermik Pinngorartitsinermillu Ingerlataqartut suleqatigiiffiata EPI-p nukittorsaaffigineqarnissaa pillugu aningaasatigullu qanoq ingerlanneqarsinnaaneranut tunngasumik misissuisussanik, inassuteqaasiortussanik soqutigisaqartunik attuumassutilinnik suleqatigiissitalioqqullugit Naalakkersuisut peqquneqarnissaanik Inatsisartut aaliangiiffigisassaattut siunnersuut. Suliaq naammassisimassaaq UPA25-mi.

(Inatsisartunut Ilaasortaq Peter Olsen, Inuit Ataqatigiit)

Tunngavilersuut:

Seqernup qungujulluni nuisarneratulli pingaartigaaq quisaarisartut illarsaaralutik quisaarisarneri. Illarneq, nuannaarneq, qungujulaarnerlu timitsinnut anersaatsinnullu peqqinnartuullunilu katsorsaataasinnaavoq. Isiginnaartitsisartutta eqqumiitsuliorortattalu inuiattut kikkuunerput, kikkunnillu kingoqqisuunerput pillugu eqqaaseqqittuartarpaatigut. Isumaliulersillatalu eqqarsalerseqqittarmatigut qujanarujussuaq. Soorluttaaq ilaqtariittut, ikinngutigiittut, suleqatigiittulluunniit nalliuottorsiulaartilluta ataatsimuulaartillataluunniit taallanik torrallatanik, erinnanillu nuanneqisunik erinarsuataaleraangatta.

Ukiuni kingullerni eqqumiitsuliornerup kulturilerinerullu silarsuaani ineriartortitsinerput nukittorsaanerpullu sukkanngikkaluartumik pitsanngoriartuaarlunilu nukitoriartuaarsimavoq.

Naak, immaqa inuit ilaanniit isumaqartartaraluartoq nunatsinni eqqumiitsuliortunut tapersersuisoqanngitsoq, isumaqarpunga tamanna eqqorpallaanngitsoq aamma illuatungilerneqartariaqartoq.

Assersuutitut taaginnarsinnaavagut 2016-mi kulturi pillugu aammalu eqqumiitsuliorneq pillugu inatsiseqalersimavugut. 2021-mi eqqumiitsuliornermut aningasaateqarfiup pilersinneqarneratigut, aningasaateqarfiup ingerlanneqarneranut eqqumiitsuliortut toqqaannartumik peqatinneqalerluttillu akisussaaqatataatinneqalernikuupput. Minnerunngitsumik eqqumiitsuliortut inuit sisamat ukiuni qulini ukiumut 250.000,-nik ataaqinaatissiisummik pisartagaqalernissaat aamma aqqutissiunneqaqqammerpoq, siullermeertumillu ukioq manna agguaanneqartussanngorlutik.

Aap, eqqumiitsuliortatsinnut kulturilerisortatsinnut tunngasunik suliarpassuaqarsimavugut, kisianni imaangilaq tassa suliassarput naammassigipput; Nassuerutigisariaqarpalpu ulloq manna tikillugu angusimasavut suli pitsaunerujussuusinnaagaluararmata, sulimi anguniagassarpassuarpuugut, sulinerpullu tamaanga killeqassanngilaq. Angusimasagut naammanngerujussuarput; Suliassarpassuaqarpugummi.

Anguniagassarpassuaqartugut suliassarpassuaqartugullu erserpoq 2022-mi ukiakkut eqqumiitsiliorneq kulturilerinerlu pillugit isumasioqatigiisitsinermi.

Isumasioqatigiinneq naammassimmat isumasioqatigiittut, suliassanik anguniagassanillu Naalakkersuisunut inatsisoqaatinik qilusunik inassuteqaasiorput..

Inassuteqaat siulleq ilaatigut ima oqaasertaqarpoq: Ingerlataqarfimmik kattuffimmillu patajaatsumik isumalluuteqarluartumillu, siunnersuinissamik ataqtigiaissaarinissamillu pisussaaffilimmik aningaasartalimmillu pilersitsisoqassasoq (Kulturimut instituti) aammalu EPI-p atuuffia sunniuteqartarneralu pitsanggorsarneqassasut.

Naluneqanngitsutut ullumikkut eqqumiitsuliortut pinngorartitsisullu “kattuffeeraqarput” EPI-mik taaguiteqartumik. Kisianni isumasioqatigiinnermi ersersinneqarpoq EPI-ip ingerlanneqarnera ullumikkut pissutsinut naleqquppallaarunnaarsimasoq, ersinngippallaartoq ersarinnerusariaqartoq, eqqumiitsuliortullu peqatigiiffiinit kattuffiinillu tamanit katersuuffiunerusariaqarroq.

EPI ullutsinnut naleqquppallaarunnaarsimasoq oqariartuitigineqarpoq. Kissaatigineqarlunilu kattuffik suli pitsaanerusoq, nukittunerusoq, annertorunerusorlu pisariaqartinneqartoq. Timersoqatigiiffiillu Kattuffiannut assingusumik pilersitsisoqarsinnaanera kissaatigineqalersimaluni.

Tamaattumik tamanna tunngavigalugu matumuuna siunnersuutigaara; Eqqumiitsuliornermik Pinngorartitsinermillu Ingerlataqartut kattuffissualiorsinnaanerat (Paraplyorganisation) siunertalarugu misissuiussanik suleqatigiinnik pilersitsisoqassasoq.

Qujanaq. Neriuppunga siunnersuutiga ilassilluarneqarumaartoq.

§37 apeqqut 020/2024 takuuk

Pisortanut aningaasatigut allaffissornikkullu kingunerisassai:

Suleqatigiissitatsumut aningaasartuutissat 500.000 koruunit qaangernissaat naatsorsuutigineqanngilaq. Naatsorsuutigineqarpoq Naalakkersuisut aki eqqaaneqartup iluani attuumassuteqartunut attaveqarnermut, ataatsimiinnernut, aaqqissuunnernut, suliamut aammalu innersuussutit tigussaasunut suliaqarnissamut sulisunik atorfinitssisiniissamut periarfissaqassasut.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.